

大乘寶要義論卷第七 第八同卷

星九

宋三藏朝散大夫試鴻臚少卿光祿大師惟淨等奉詔譯

如華嚴經云大毗盧遮那解脫吉祥世界中
普徧智燄功德幢王如來建立無量有情住
聲聞地無量有情成熟緣覺菩提無量有情
成熟迅疾辯才出生菩提無量有情成熟無
垢精進幢出生菩提無量有情成熟法辯才
出生菩提無量有情成熟根清淨辯才出生
菩提無量有情成熟十力諸行圓滿出生菩
提無量有情安住法城現前境界一乘出生

永樂北藏

大乘寶要義論

第一二六册

菩提無量有情於一切處隨現種種神通一
乘理法出生菩提無量有情建立諸行普攝
無量方便出生菩提無量有情安住三摩地
分位理法出生菩提無量有情安住一切所
緣境界清淨道場理法出生菩提無量有情
發菩薩菩提心無量有情住菩薩道無量有
情安住清淨波羅蜜多道無量有情住菩薩
初地乃至住於菩薩十地此中應知菩薩常
以正法攝受一切何等是正法攝受如信力
入印法門經云佛言妙吉祥正法攝受故即

菩薩攝受菩薩攝受故即正法攝受正法攝受故一切有情攝受一切有情攝受故即佛種不斷所成就又若欲令佛種不斷欲破一切有情諸業煩惱欲閉一切惡趣之門欲受無量無數轉輪聖王上妙快樂及梵王帝釋護世等樂欲斷一切惡魔罣索乃至欲成阿耨多羅三藐三菩提果者悉當以其正法攝受此中應問初發心菩薩以少善根彼當云何攝受正法如菩薩藏經云菩薩若具四種法者彼即不減菩提轉生當作轉輪聖王

如其願力即得一切善根隨轉得如大力堅固那羅延身彼得轉輪聖王已修四梵行主於梵世爲梵天主何等爲四一者菩薩若見如來塔廟故壞發勤勇心而爲治飾乃至以一泥團作其供獻二者於四衢道或闌闌之所建立如來高顯妙塔或塚廟像或隨立幢星九相或但豎利竿或安如來形像或別別安布如來諸相所謂轉法輪相或復踰城出家之相或菩提樹下成正覺相或現大神通降魔軍相或示現入大涅槃相或忉利天下降之

相三者若見聲聞弟子衆中有離間者爲作和合四者於如來教中若見正法欲滅滅時乃至一四句偈勇力護持使彼流通令不忘失又於正法或說法師皆爲攝受乃至捐棄身命終不捨法寶雲經云佛言善男子菩薩若具十種法者即能攝受正法何等爲十一者於後末世後五百歲正法滅時如來教中起雜亂事而諸有情多住邪道息滅智燈無正師授爾時應以廣大經典具大威力攝廣大義如一切法母者尊重供養受持讀誦宣

說解釋二者以甚深經爲他演說解釋開示使其解了三者於修正道人所發生歡喜清淨之心四者得歡喜已爲彼攝受五者以無著心爲他說法使其聽受六者於說法人所起師尊想七者於其正法起甘露想八者又於正法如良藥想九者不惜身命希求正法十者以所得法如說修行是爲十法寂靜決定神變經云佛言賢護菩薩若具四種法者即能攝受正法何等爲四一者於自快樂而不愛著二者施於他人上妙快樂三者具大

悲心四者求法無厭彼經又云過去世時無垢威光王於大高如來所千歲之中種諸善根以一切樂具供養彼佛及以四事給施八萬四千諸苾芻衆如是過千歲已彼大高如來告無垢威光王言大王如是滿足千歲於如來所行諸施法若比勤行求法菩薩一出入息中所有善根百分不及一乃至烏波尼殺曇分亦不及一何況於正法中乃至一四句偈勤行宣說解釋其義彼福邊際我不能說大王且置是事正使如是滿足千歲盡諸

所有布施供養總以為聚施一遊方苾芻如是或施諸苾芻衆若於勤行宣說講授菩薩所以樂法故於彼尊重起於淨信持以飲食生如是心我為求正法故以此飲食而為獻施以前布施之法比此善根百分不及一乃至烏波尼殺曇分亦不及一如來祕密經云所有菩薩福蘊若比攝受正法福蘊此復倍多正使一切諸佛勤劬宣說經俱胝劫尚不能得受持正法福蘊邊際何等正法如勝鬘師子吼經云此正法者即是大乘增語何以

故大乘出生聲聞緣覺之乘及世出世間一切善法故法集經云彼正法攝受者所謂於一切如來諸說甚深甚深經典宣說講授專注思惟是爲正法攝受當知諸菩薩若依著有所得行雖經無量時供養諸如來於彼彼佛所然不得授記星九況復成菩提如梵玉問經云佛言大梵我於一劫若過一劫宣說彼彼如來名字若我供養是諸如來或復於彼我修梵行及修六波羅蜜多我於彼彼佛所未得授記何以故我於有所得行而依著故若

我爾時於然燈如來所纔見彼佛即得無生法忍彼佛世尊與我授記我於爾時超過一切有所得行而復圓滿六波羅蜜多於甚深法中能生信解所有諸菩薩自利利他最勝諸行悉得周畢大集經月藏品云佛言月藏彼勝義諦即能成就阿耨多羅三藐三菩提不共一切聲聞緣覺所有是故世俗諦不能成就阿耨多羅三藐三菩提最上善根及辦諸勝行月藏如人持以燭火不能枯涸甚深大海彼世俗諦亦復如是尚不能涸自煩惱

海況復爲他諸有情類此中何能信解甚深之法如菩薩藏經云菩薩有二種慧一者從他聲聞二者自心深固作意此中何等是從他聲聞若有菩薩雖復樂修諸相應行然於菩薩藏正法不樂聽受又不樂聞諸聖法律於定中少味而爲喜足慢心熾盛故墮增上慢而彼菩薩不能解脫生老病死憂悲苦惱亦不解脫六趣輪迴又復不能解脫苦蘊以彼緣故如來說言從他聲聞而此所聞不能解脫老死等法何等是爲深固作意所謂善

薩自作是學無所有法而可和合非不和合是深固行此深固行即是非行增語彼如是聲若前際若後際如實伺察從何所生復從何滅又若言說若義理若斷若證若已說若當說彼等一切如實伺察無過去相無未來相無現在相可得即一切法自性寂滅自性寂靜自性圓滿畢竟無生無起無實應觀諸法畢竟涅槃若如是觀即無所觀亦非無觀此名正觀況復一切法如實可觀耶是即無所觀此無所觀亦即無生增語若一切法無

生即不越正理若一切法平等即佛法平等如是所說是為不越正理此說名為深固作意如是乃能解入最上甚深正法父子合集經云佛告淨飯王言大王若或空劫時或有梵天樓閣出現於前七寶所成彼堅實性若生起時從何所來如是欲界他化自在天化樂天兜率天夜摩天忉利天四大王天是等諸天樓閣悉現七寶所成又鐵圍山大鐵圍山堅實一聚金剛所成是等諸山彼堅實性從何所來又須彌山你民達囉山持雙山

持軸山持金剛山竭那里酤山尾那怛酤山馬耳山善見山大善見山烏咎識盧山香醉山雪山及餘黑山悉現於前乃至一切三千大千世界而悉出現且彼須彌山王去地八萬由旬其堅實性悉集現前從何所來大王若此世界成後大地火然大水流大風鼓星九擊其火亘空所有煙燼悉無所現如酥或油投火中燒亦無煙燼其水漂時無餘可得如鹽投水而悉混融亦無有餘其風鼓擊無少物可現如毗嵐風當吹鼓時何有飛鳥而可

得現此三千大千世界亦復如是火然水漂
風鼓之時無餘可見彼堅實性如是壞滅從
何所去此說外地界內地界亦然及餘諸界
若內若外亦復如是是故一切法生時無所
從來滅時亦無所去彼等有生決定皆空生
已亦復自性皆空阿闍世王經云爾時阿闍
世王於其宮中飯佛世尊及諸菩薩聲聞大
衆盟手滌器已於妙吉祥菩薩之前肅恭而
坐聽受正法王言菩薩願今爲我解除惡作
妙吉祥言大王假使殞伽沙數等諸佛世尊

亦復不能爲汝解除惡作阿闍世王聞是語
已驚怖無救悶絕躡地是時尊者大迦葉即
告王言止止大王勿生驚怖此妙吉祥菩薩
善能爲汝說自因緣應作是問以何緣故菩
薩作如是說時阿闍世王從地徐起白妙吉
祥菩薩言以何緣故菩薩作如是說妙吉祥
言大王於汝意云何汝心有所緣觀佛世尊
耶王言不也妙吉祥言汝今云何觀心生耶
王言不也妙吉祥言觀心滅耶王言不也妙
吉祥言觀有爲法耶王言不也妙吉祥言觀

佛世尊於有爲法有表示耶王言不也妙吉祥言大王於汝意云何若諸法中無法可觀者而容有法可解除耶王言不也妙吉祥言大王以此緣故我作是說假使殫伽沙數等諸佛世尊亦不能爲汝解除惡作復次大王若此空中或煙或塵欲滌虛空於汝意云何是彼煙塵能滌空不王言不也妙吉祥言大王又或有人作如是言我欲清淨虛空而彼虛空其能淨不王言不也妙吉祥言大王如來亦復如是與虛空等說一切法本來相續

自性無滌彼無有法若滌若淨而實可觀是中復何有所解除大王我於是義如實正觀故作是說假使殫伽沙數等諸佛世尊亦不能爲汝解除惡作復次大王諸佛世尊內心非有所得非有所起外亦非所得非所起何以故一切法自性無所起若法自性無所起故即無處容受有所起性何以故一切法自性無所起故即無所成一切法無所成故即無所集一切法無集故即無出生一切法無出生故即法離性一切法離性故即無能作

行一切法無能作行故即無有生一切法無
 有生故即無異熟法一切法無異熟故即無
 起作一切法無起作故即無所染一切法無
 染故即自性明亮一切法自性明亮故即法
 清淨一切法清淨故即虛空等一切法虛空
 等故即無對治一切法無對治故即離於二
 一切法離二故即離二邊一切法離二邊故
 即法無邊一切法無邊故即無涯際一切法
 無涯際故即無究竟一切法無究竟故即無
 所緣一切法無所緣故即於一切處無顛倒

住一切法於一切處無顛倒住故即常樂我
 淨悉不可得一切法常故即無動轉相應一
 切法淨故即自性明亮所成一切法樂故即
 無分別相應一切法我自性故即無我表示
 相應一切法無惡作故即內心寂止一切法
 無實故即勝義諦無所安立一切法寂靜故
 即徧寂相一切法無我故即我所相離一
 切法無味故即解脫相一切法離名故即名
 差別不可得一切法無分別故即種種性離
 一切法一味故即解脫普攝一切法離相故

即無相際一切法無相故即無解了所緣清淨一切法空故即一切見作皆離一切法無願故即超越三世一切法三世斷故即過去未來現在皆不可得一切法涅槃普攝故即畢竟無生大王於汝意云何若法無生復無九積集是中還能有所滌不王言不也妙吉祥言又復有法可解除耶王言不也妙吉祥言大王由如是故如來知一切法與涅槃等乃於是中無有惡作而能解除是故大王彼深固相應當如是行以無顛倒心應當如實作

其伺察如何伺察已隨伺察時無有少法可取可捨亦無有法而可共住若一切法不共住故此說是為輕安若法輕安即法寂靜若法寂靜是即法自性若法自性即無自性一切法無自性故即無主宰大王於中應作忍法即此亦復無法可作何以故大王所作寂靜故如是了者當證涅槃此中亦復無法可作亦非無作若作若非作此說皆歸涅槃寂靜

大乘寶要義論卷第七